

S. e. 217

\* 88

Theologie  
E. VII 449

# Eine Kurtze

Erklärung etlicher Ge-

heimnis aus der Histori vom  
leiden/sterben/fröliche Aufer-  
stehung vnd Himelfart / vnseres HERN

IHESV CHRISTI, ganz nütze-  
lich zu lesen/vnd in Druck  
verfasset.

Durch

M. Johan. Kanffmann/  
Northusenum.



Wittenberg.

1567.

Faint, illegible text, possibly bleed-through from the reverse side of the page.



Faint, illegible text located below the circular stamp.

Der Durch-  
leuchtigen/ Hochgebor-  
nen Fürstin vnd Frawen/  
Frawen Hedwig / geborne  
Marggrefsin zu Brande-  
burg etc. Herzogin zu Brun-  
schwig vnd Lüneburg/  
Meiner gnedigen  
Fürstin.

Wünsche ich Johannes  
Kantius / Gottes gnade / vnd fride /  
durch Ihesum Christum vnsern  
einigen Erlöser vnd Mit-  
ler zuvor an.

**E**s sind viel Leute  
die da zweiueln /  
ob Gott auch ge-  
recht sey / ob er das  
Menschliche ge-  
schlecht  
A ij schlecht

## Vorrede.

schlecht liebe / vnd ein auffse-  
hung auff dasselbige habe /  
wenn sie sehen / das sie so vie-  
ler anfechtung / Kreuz vnd  
elend vnterworffen werden /  
sehen das die Türcken vnd an-  
dere Heiden greswlich toben /  
vnd die vnmündigen Kinder /  
vonden Müttern reissen / die-  
selbigen sampt den Eltern / er-  
bermlich tödten / oder mit sich  
von der waren Religion vnd  
lere / in öffentliche Abgötterey  
vnd Gotteslesterung hinweg  
führen. Sehen auch das die  
Weltlichen Regimenten je-  
merlich fallen / ein Krieg vber  
den ander sich errege / das  
es den Bösen wolgethet / die  
Fromen

## Vorrede.

Fromen aber allenthalben  
darniderligen / von jederman  
veracht / vnd von den Tyrannen  
on alle billiche vrsach an-  
gefochten / vnd mit allerley  
Creutz vnd pein gemartert  
werden / vnd furnemlich weiß  
sie sehen / das in diesem leben /  
aus sonderlichem Gottes  
rath / die Christliche Kirche  
vnd Gemeine / dem Creutz  
vnterworffen wird / fahen sie  
so baldt an zu zweiueln / ob  
auch Gott gerecht / from vnd  
Barmhertzig sey / etc. vnd be-  
dencken nicht / das solches al-  
les geschicht vmb unsere vn-  
dancckbarkeit / welche ein quell  
vnd vrsprung ist / alles vn-

A iij

glücks

## Vorrede.

glücks vnd elends / vnd solches  
also aus Gottes Rhat vnd  
willen geschehe.

Gott der Allmechtige hat  
vns vnaussprechliche wol-  
thaten erzeiget / in dem das er  
vns erschaffen hat / noch teg-  
lich erhelt / vnd alles was wir  
zur notdurfft des Leibes be-  
dürffen / gnediglich gibt. Aber  
viel grosser wolthaten hat er  
vns in dem gethan / das er  
vns aus seinem verborgenen  
schoß seinen einigen Son ge-  
sand / welcher fur vns ist ein  
Opffer worden / vnd den gros-  
sen zorn Gottes wider vnser  
Sünde / auff sich genommen /  
vns

## Vorrede.

uns vom Ewigen Tod / von  
den stricken vñ listen des Teuf  
fels erlediget.

Wer betracht nu solche gros-  
se wolthaten? Wer dancket  
Gott fur dieselbigen? welches  
herz wirt doch drüber bewegt?  
Warlich es ist zu erbarmen /  
das wir / die wir von dem Her-  
ren Christo den Namen ha-  
ben wollen / vnd Christen ge-  
nant werden / vnd welchen  
Gott so grosse Gnade vnd  
barmherzigkeit beweiset hat /  
von den Heiden in der danck-  
barkeit / sollen überwunden  
werden. Denn die ob sie wol  
von der rechten Religion ni-  
chts wissen oder gewust / ha-  
ben

A iij

ben

## Vorrede.

ben sie doch mit grosser erbie-  
tung/ ire Götter geehret/ vnd  
noch ehren / mehr als wir / de-  
nen Gott sich warhafftig mit  
herrlichen Mirakeln vnd  
Wunderzeichen offenbaret  
hat. Denn so die weisen vnd  
gelerten Heiden etwas new-  
es erfunden hatten / haben sie  
baldt iren Musis vnd Göt-  
tern dafur gedancket / damit  
anzeigen wollen / das alles  
was es auch were / nicht durch  
sie erfunden oder erdacht / son-  
dern von den Göttern inen  
eingegeben / vnd denselbigen  
zu dancken were / So schrei-  
bet auch Cicero / der hochbe-  
rumbte Orator vnd Burge-  
meister

## Vorrede.

meister zu Rom / das der Pythagoras / welcher doch sonst viel Wunderliches dings furgeben hat / so hoch die Götter geehret habe / das / wenn er etwas neues in der Geometria erfunden hatte / habe er den Musis oder Göttern einen Ochsen geopffert / damit angezeigt / das solches von ihm nicht erfunden / sondern von Gott / zum gemeinen nutz der Menschen im gezeigt vnd offenbaret were.

D Zeweil nu Pythagoras vnd andere mehr / gegen die Götter / fur erzeugte wirlthaten / sich danckbar gehalten

A v ten

## Vorrede.

ten haben / die doch nichts von  
dem waren vnd lebendigen  
Gott gewust / was sollen wir  
thun / die wir wissen / wer der  
rechte vnd ware Gott sey / vnd  
welchen er sich offenbaret hat /  
vnd von seinem Son gesagt /  
wie im andern Psalm stehet /  
Küsset den Son / das ist / der  
zu euch komet / vnd euch alle  
seligkeit bringet / den nemet ger  
ne auff / stosset in nicht von  
euch / hasset vnd verachtet in  
nicht ?

Wie sollen nu wir Chri-  
sten vns gegen Gott stellen ?  
nicht als die / die da etwas  
newes / wie der Pythagoras  
in

## Vorrede.

in der Geometria erfunden  
haben/ sonder als die/die wir  
ihund wissen Gottes gnedi-  
gen willen gegen vns / wel-  
cher seinen einigen Son vom  
Himmel herab gefand / in las-  
sen Menschliche natur anne-  
men / vnd darnach lassen ein  
Opffer werden / fur der ganz-  
hen Welt Sünde / der den  
grossen zorn des. Vaters wi-  
der die Sünde gestillet vnd  
versünet / vnd alles was vns  
durch den fal / vnser ersten  
Eltern auffgeerbet vnd an-  
geboren / auff sich genommen /  
vnser krankheit vnd schmer-  
ken getragen / wie der Pro-  
phet sagt : Ja auch am stam  
des

## Vorrede.

des Creutzes seinen Geist  
auffgeben / daran seine Hen=  
de vnd Füße / vnd Seiten  
lassen durchstechen / vnd er  
vnschuldig / vmb vnser misse=  
that willen / den schmelichen  
Tod erlidden / vnd den Mör=  
dern gleich gerechnet worden.  
Darüber den auch die Son=  
ne wen schein wider die Na=  
tur verloren / die Erde gebe=  
bet / der grosse furhanck am  
Tempel zu Jerusalem zerris=  
sen / die Steinfelse sich zertei=  
let / der Todten Greber sich  
auffgethan haben / vnd der=  
gleichen Wunderzeichen viel /  
in der zeit des leidens Chri=  
sti sich zugetragen / damit wir  
ja

## Vorrede.

ja sollen lernen erkennen/ den  
grossen zorn Gottes / wider  
die Sünde / denn darinnen  
zusehen ist / das Gott gew-  
lich umb der Sünde zürne /  
das in auch keines grossen  
Königes/keines Heiligen noch  
Engels tod oder leiden / demt  
allein der Tod seines einigen  
Sons hat versünen können.  
Sollen derwegen Gottes ge-  
strenge Gerichte / wider die  
Sünde / allhie wol beherzi-  
gen / vnd vns für sicherheit  
des lebens hüten/ vnd es nicht  
so für eine geringe sache hal-  
ten / so wir etwas wider Got-  
tes willen furnemen / dieweil  
Gott die Sünde / so hoch ach-  
tet

## Vorrede.

tet. Vnd S. Paulus sagt /  
Christus ist für vns ein fluch  
worden / welche wort anzei-  
gen / das der Son Gottes  
nicht einen geringen zorn des  
Vaters ausgestanden habe /  
vnd wil / das wir den Tod  
Christi sollen ergreifen / an  
demselbigen für Gottes zorn  
erschrecken. Wie er auch zum  
Römern am 6. Cap. spricht /  
So wir aber sampt im ge-  
pflantz werden / gleich wie  
er in seinen Tod / etc. das ist /  
so sollen wir recht erschrecken /  
vnd Gottes zorn erkennen /  
vnd so oft wir an den Tod  
Christi gedencen / so sollen  
wir erschrecken für der Sün-  
de /

## Vorrede.

de / vnd vnserer Sicherheit  
des lebens verdammen / das  
wir die Sünde so gering ach-  
ten / die doch Gott so seer  
verflucht / das er auch durch  
keine ander Spffer hat wol-  
len versünet werden / denn  
durch den Tod seines Sons.

Dieweil denn nu ich zu  
nutz des gemeinen Volcks /  
vnd zu erinnerung der grossen  
wolthaten Gottes / welche er  
vns erzeiget / mit seinem vn-  
schuldigen leiden vnd sterben /  
für vns alle / welche man nicht  
alleine auff gewisse zeit / son-  
dern alle tage für vnd für be-  
trachten sol / diese Geheimnis

## Vorrede.

in Druck wolte verassen/ habe ich solche E. F. G. wollen zuschreiben/ Dieweil mir bewust / das E. F. G. Gottes wort liebe vnd vleissig forderre / auch von Gott gerne hören. Bitte derhalben demütiglich E. F. G. wolle solche meine kleine verehrung / vnd geringe gaben / zum besten aufnehmen/ vnd ir gefallen lassen. Gott der Allmechtige wolle E. F. G. fur aller gefahr des Leibes vnd der Seelen / gnediglich schützen vnd handhaben/ vnd ein langes glückseliges leben verleihen vnd mitteilen /  
**AMEN.**

**Ein Kurtze**  
Erklärung etlicher ge-  
heimnis aus der Histori vom  
tod vnd aufferstehung vnsers  
lieben HErrn Ihesu Christi/  
welche gantz tröstlich vnd  
nützlich zu wissen.

I.

Was aus der Passion am fur-  
nemsten zu mercken / vnd  
wie man sich draus  
sol bessern.



**V**r sind schuldig  
Gott dem Vater /  
desgleichen seinem  
geliebten son vn-  
serm Herren Ihesu  
Christo / hertza-  
liche dancksagung zuthun / für  
die

Die große gnade/liebe vnd barm  
hertzigkeit / als das Gott der  
Vater seines einigen Sones  
nicht hat verschonet / sondern  
hat in für vns alle dahin gege-  
ben / Roma. 8. vnd 1. Johan. 4.  
Daran ist erschienen die liebe  
Gottes gegen vns / das Gott  
seinen eingebornen Son gesand  
hat in die Welt / das wir durch  
in leben sollen / Vnd das Gott  
der Son / für vns Knechts ge-  
stalt angenommen / gleich wor-  
den wie ein ander Mensch (doch  
on sünde) sich selbs ernidriget /  
vnd gehorsam worden / bis zum  
tode / ja zum tode am Creutz /  
Phil. 2. vnd 1. Johan. 3. Daran  
haben wir erkand die liebe / das  
er sein leben für vns gelassen hat.  
Für eins.

## II.

Zum andern / Sintemal vn-  
sere sünd die Hauptursach sind /  
darumb

darumb Gott seinen lieben Sohn  
hat vbergeben / zum leiden vnd  
zum tode / auff welchen er vnse-  
re sünde gelegt / dieselbige zu tra-  
gen / vnd dafur zu bezalen / Esa.  
53. Johan. 1. Als sollen wir vns  
hinfort für sünden hüten / da-  
von ablassen / vber sie dominiren  
vnd herrschen / vnd wissen / das  
wer da sündiget / sonderlich mit  
willens / der leider viel sind / in  
sonderheit die jcnigen / so Got-  
tes namen lestern / bey seiner  
Marter vnd Wunden fluchen /  
derselbig furware dem **HERRN**  
Christo sein leiden / vnd seine  
schmertzten jm vermehre. Ja wer  
sündiget / der peitschet den **HERRN**  
**CHRISTUM** auff's new mit Geißeln /  
schlecht in in sein heiliges ange-  
sicht / verlachtet in / hat ein wol-  
gefallen an seiner schmahen vnd  
marter / er rottelt die Nagel am  
Creutz / damit er durch Hende  
vnd Füße durchboret vnd ange-  
beißt /

**B ij**

beißt /

hefft / auff das die Wunden ja  
größer vnd schmerzlicher wer-  
den. Summa / er creutziget den  
HERRN auff's new / vnd die-  
ses thun in sonderheit die schend-  
lichen Messprieſter. Item wer  
ſündiget / iſt ſo vil / als das er die  
ſünde wider herfür ſcharre vnd  
auffgrabe / welche Chriſtus  
durch ſein leiden vnd tod außtil-  
get / vnd mit ſich in ſein Grab  
genommen vnd verſcharret hat /  
das ſie keinem gleubigen ſollen  
ſchaden.

### III.

Zum dritten / ſollen wir vns  
ſeines leidens / wider die anfech-  
tung der ſünde / vnd wider das  
ſchrecken des Todes vnd der  
Hellen tröſten / vnd gedencken  
an den Spruch Pauli Roma. 5.  
Gott preiſet ſeine liebe gegen  
vns / das Chriſtus für vns ge-  
ſtorben iſt / da wir noch Sün-  
der

der waren / so werden wir ja viel  
mehr durch in behalten werden  
für dem zorn / nach dem wir  
durch sein Blut gerecht worden  
sind.

### III.

Zum vierden / sollen wir an  
vnserm D<sup>er</sup>ren Christo lernen /  
gedultig sein im Creutz vnd lei-  
den / wie er selber spricht / Der  
Knecht ist nicht mehr denn sein  
Herr. Vnd wie S. Gregorius  
sagt / Nihil tam durum, quin leue fi-  
at, si passio Christi reducatur ad me-  
moriam.

## Von Christi wolthaten gegen vns.

Christus passus est pro salute  
nostra, exoluit quæ non rapuit.  
Er hat gethan als einer / der für  
den andern Bürge wird / vnd  
darnach die schuld dazu beza-  
let / Dder der ins Gefengnis ge-  
het /

B ij

het /

het / vnd nimet alle sachen / ja alle  
le gefahr / schuld vnd pein auff  
sich des Befangenen / vnd letz  
den Tod selbs. Adam hat vns  
durch seine vbertrettung vnd  
vnghehorsam / dem Teuffel zu  
geeignet / verkaufft / vnd im des  
halben eine Wandschrifft vber  
geben. Aber Christus Gottes  
vnd Marien Son / wil des  
Kauffs dem Teuffel nicht ge  
stendig sein / wird derhalben  
Mensch / nimet die sünd auff  
sich / die im dermassen so ban  
ge gemacht / das er Blut ge  
schwitzt / steigt ans Creutz vnd  
stirbt für vns / versünet dadurch  
den zornigen Gott / zerreisset die  
Wandschrifft / tilget die sünde /  
stehet wider auff / würget den  
Tod / vberwindt den Teuffel /  
zerstöret die Helle / erwirbt vns  
gnade / vergebung der sünden /  
vnd die Erbschafft des ewigen  
Lebens / Setzt auff gen Himel /  
das

das er vns die stede bereite / die  
Herberge bestelle / bis er vns  
am Jüngsten tage wird hinach  
holen / das wir sein sollen da er  
ist / vnd sehen die Herrligkeit die  
im sein Vater gegeben hat.

Von dem Weibe / welche  
dem HERRN das köstliche  
Nardenswasser auff sein heupt  
gos / da er zu tische sas zu  
Bethanien.

In diesem Weibe wird vns  
gar fein furgebildet das Christ-  
liche wesen / welches stehet im  
Glauben / in der Liebe / vnd in  
bestendiger bekenntnis an das  
Euangelium von Ihesu Chris-  
to / auch in gedult im Creutz /  
so der Predigt des heiligen  
Euangelij pflegt zu folgen.

1. Glaube dieses Weibes / das  
sie Christum Ihesum für den

B iij      Messias

Messiam helt / welcher den Ven-  
tern verheissen / vnd durch die  
heiligen Propheten verkündiget  
ist worden / das er solte vmb vn-  
sers Heils willen / am Creutz lei-  
den vnd sterben / des zum War-  
zeichen / begehret sie den Leib  
Ihesu mit köstlicher Salbe /  
nach Jüdischer gewonheit / als  
einen der sol begraben werden /  
Sol er aber begraben werden /  
so mus er zuuor sterben. Sol er  
nu sterben / so mus er was grö-  
ßers vnd wichtiger s / hinter oder  
auff sich haben / denn er ist vn-  
schuldig / vnd hat den Tod  
nicht verwircket / Dargegen  
mus es geschehen zur erlösung  
des menschlichen Geschlechts /  
darumb ergert sie sich nicht an  
seinem tod / sondern helt densel-  
ben tewr vnd werd / als das er  
sein werde das precium / der lohn  
für die sünde der Welt / Solchen  
glauben an Ihesum Christum /  
sollen

sollen wir auch haben / als der  
das rechte Pfand vnser erlö-  
sung / ja die erlösung vnd das  
heil selbs ist.

2. Liebe des Weibes / als die  
sich keine vnkosten lesset zu  
schwer sein noch düncken / da-  
mit sie auch die aller köstlichste  
Salbe / das tewre öl von Nara-  
den blumen müge zuwege brin-  
gen / damit den **HERN** zu  
salben / welches die Jünger  
schätzten auff 300. Groschen /  
machtet bey vns bey 37. Keini-  
scher Guldern. Solche liebe sol-  
len wir auch haben / sollen vnter  
einander barmhertzig sein (Das  
öl heisset Barmhertzigkeit in  
der Schrift) den dürfftigen ge-  
ben vnd helffen / den Predigstul  
bedencken / arme schüler zur  
Schule halten / wie denn solchs  
an vielen orten in der heiligen  
Schrift geboten wird.

3. Beständigkeit dieses Weib-  
es /

B v

bes /

bes / als die es frey waget / achtet den zorn vnd den hasß / der Hohenpriester vnd Phariseer gar nichts / welche dem HErrn Christo nach leib vnd leben stunden / hatten sich zu dem noch vereiniget / die jenigen in Bann zu thun / die in für Christum bekenneten / Joha. 9. Desgleichen sollen wir auch thun / wie Christus leret / Matthe. 10. Marci. 8. Roma. 10. vnd an vielen mehr örtern.

### Meine zeit ist erbey Komen.

Bedeut / das Christi leiden für vns / sey aus gutem willen geschehen / darumb er gleich dem Tode entgegen reiset / aus gehorsam gegen seinem Himlischen Vater / vnd aus liebe gegen den Menschen / vnd das es deswegen in der Hohenpriester vnd

Vnd der Jüden macht nicht ge-  
wesen / im dem Herrn Ihesu ei-  
nen Finger anzurühren / da solchs  
inen nicht von Gott verhenget  
vnd zugelassen were / wie sie  
denn zu rücke filen / da er sagt:  
Ich bins. Er gedencket auch ne-  
ben seinem leiden vnd tode der  
heiligen aufferstehung / als er  
spricht / Wenn ich mit euch trin-  
cken werde im Reich Gottes /  
vnd tröstet sich also selbs / vns  
zur Lere / wenn wir vnter dem  
Creutz ligen / vnd trübsal leiden /  
das wir jmer zu des besten ver-  
hoffen sollen / vnd gedencken / es  
werde damit ein mal ein ende ne-  
men / vnd eine freude hernach  
folgen / gleich wie nach dem  
Karfreitag der Ostertag / nach  
einem Platzregen / der helle  
schein der Sonnen / nach dem  
harten Winter / ein frölicher  
Sommer nach trawrigkeit ei-  
ner Kindgebererin / die freude  
zu folgen pflaget. Vom

# Vom Fußwaschen:



**E**s ist zweierley Fußwaschen / ein leibliches vnd ein Geistliches.

1. Das leibliche Fußwaschen geschieht / wenn die Oberkeit / Kirchen vnd Schulen / mit gelehrten vnd tüchtigen Personen versehen

versehen / vnd in irem Regiment  
gute Ordnung halten / mit iren  
Vnterthanen friedsam sein /  
Zucht vnd erbarkeit fördern vnd  
handhaben / schande vnd vntu-  
gent straffen / Vnd wenn die Vn-  
terthane irer Oberkeit gehor-  
sam sind / geben was jr gebürt /  
vnd bitten für sie trewlich.

2. Wenn die Prediger vleissig  
studiren in der heiligen Schrifft  
die Einfeltigen vnterweisen / die  
schwachen trösten / vnd führen ei-  
nen guten wandel / vnd wenn  
die Zuhörer iren Predigern fol-  
gen / dieselbigen in ehren halten /  
vnd verschaffen jnen zimliche  
notdurfft.

3. Wenn die reichen Leute  
Predigstul vnd Schulen helffen  
erhalten / vnd den armen behülff-  
lich sind / mit iren Allmosen /  
vnd wenn die armen für die  
reichen bitten / vnd sind Gott  
danckbar.

4. Wenn

4. Wenn die Hausvater vnd  
Hausmütter ire Kinder vnd  
Gesinde vleissig ziehen zur furcht  
Gottes / halten sie zur Kirchen /  
vnd das sie müssen züchtig sein:  
Die Kinder / wenn sie iren El-  
tern gehorsam sind / vnd das  
Gesinde / wenn sie iren Herrn  
vnd Frayentrewlich dienen.

Das Geistliche fuswaschen /  
das vns vnser lieber Herr Ihes-  
sus Christus / mit seinem heiligen  
Blut gewaschen hat in der  
heiligen Tauffe / darumb wir  
rein sind / Denn in der heiligen  
Tauffe haben wir Christum an-  
gezogen / welcher ist die volko-  
mene reinigkeit vnd gerechtig-  
keit / vnd bedürffen nicht denn  
nur die Füße waschen / das ist /  
die vbrigen sünden vnd bösen  
begirten / so sich in vns regen /  
dempffen / zemen vnd creutzigen  
denn es gehet on sündigen nicht  
ab /

abe/diewell wir in dieser kotigen  
Welt sind / die voller vntugent  
vnd ergernis ist. Darumb spre-  
chen wir: Vergib vns vnser  
schuld. Vnd/Ich glaube verge-  
bung der sünden.

Ein new Gebot gebe ich  
euch/das jr euch vntereinan-  
der liebet / wie ich euch ge-  
liebet habe.

Wenn wir vns vnter einan-  
der liebten / wie vns Christus  
geliebet hat / Lieber was were  
doch die Welt anders/denn ein  
lustig Paradis? Denn wenn ein  
jeder betrachtet / was das ge-  
sagt sey/Was jr wolt/das euch  
die Menschen thun sollen / das  
thut jr jnen auch / so were vnter  
vns kein Geitz / kein Wucher/  
kein Ehebruch / kein Durerrey/  
kein Dafs / kein zorn / kein Hof-  
fart/

fart/kein Diebstal/kein Mord/  
kein Ungehorsam / kein Betrug/  
kein Krieg/ noch kein Un-  
tugend/sondern eitel friede/einig-  
keit/trew/zucht/demut/gehorsam/  
vnd dergleichen mehr.

Von dem das der Herr blut  
schwitzet im Garten.



Dies

Dieuon reden die alten Lerer  
also: Sanguinei sudoris effusio fuit  
it miraculosa à Christo super natu-  
ram facta, ut tali signo insolito à  
saeculis non audito, insolitam anxie-  
tatis suæ & doloris magnitudinem  
demonstraret, propterea non mo-  
dicas fudit guttulas, sed guttarum  
imbrem, suo effluxu non solum ve-  
stes sed etiam terram tingentium.  
Darumb saget der Euangelist/  
Factus est sudor eius tanquam gut-  
tæ sanguinis decurrentis ( non stil-  
lantis inquit ) in terram. Gott wol-  
le geben / das wir mögen rechte  
Büsse thun / vnd ein bar Thre-  
nen aus vnsern augen eins mal  
fallen lassen / vmb vnser sünde  
willen / welche dem Son Got-  
tes / blutigen schweis von sei-  
nem Leib geiagt.

## Vom fall Petri.

Weil derselbig so vleissig be-  
schrieben

schrieben wird / mus traum dar=  
an was gelegen sein / das man  
denselbigen recht verstehe / sonst  
hette es dieses ansehen / als het=  
ten die Apostel vnter einander  
ire eigene schande nicht ver=  
schweigen können / Dionon  
schreibet S. Augustinus lib. 3.  
de doctrina Christiana also : Ad  
hoc antiquorum Patrum delicta  
scripta sunt, ut Apostoli Pauli sen=  
tentia teneatur ubiq̃, cum ait: Qui  
stat, uideat ne cadat. Vnd lib. 10.  
confessionum: In hac presentia uita  
nemo potest esse securus, quæ tota  
nil aliud est, nisi tentatio. Darumb  
leret Christus also beten. Vnd  
füre vns nicht in versuchung.  
Nu beschreiben die heiligen E=  
uangelisten den fall Petri / Erst=  
lich / von wegen ires Ampts.  
Denn wer wil eine Historiam  
beschreiben / vnd das man im  
sol glauben geben / der mus der  
edlen warheit zu gut / on alle  
schew

schew vnd ansehen der Perso-  
nen/ allerley vmbstende gründ-  
lich vnd eigentlich anzeigen/  
Weil nu an der heilsamen Dis-  
storia vom leiden Christi / gar  
viel vnd mercklich gelegen/ Wie  
S. Augustinus zeuget vnd  
spricht: Christi passio, est nostra ins-  
tructio. Vnd S. Paulus Roma.  
15. Alles was geschrieben ist/  
das ist vns zur Lere geschrie-  
ben/ als haben die heiligen E-  
uangelisten in derselben Disto-  
ria / des falls Petri auch nicht  
müssen geschweigen.

Zum andern / den Glenbia-  
gen in der gantzen Kirchen zu  
nutz / damit ein jeder Mensch  
sein angeborne schwacheit vnd  
gebrechen lerne erkennen / vnd  
das doch auff Menschen gar  
nicht zu bauen sey / Darumb  
sol man Gott fürchten / nicht  
sicher sein/ vnd zu Gott vleissig  
beten: Ne sinat nos induci in tenta-

C ij tiones,

triones. Petrus vermas sich höch/  
als es aber an ein treffen gieng/  
lies er sich eine Pfaffenmagd  
schrecken / vnd zu einer gewo-  
lichen sünde bewegen. Vnd ist  
sich zuuervndern / der zuvor  
gesagt hat: Du bist Christus  
des lebendigen Gottes Son/  
Matth. 16. Der wil in nu nicht  
kennen / der zuvor gesagt hat.  
Herr / wo sollen wir hin / du  
hast wort des Lebens. Johan.  
6. Der wil itzund von im gar  
nichts wissen / der zuvor seine  
herrligkeit / vnd ein wares zeug-  
nis seiner Gottheit gesehen hat /  
auff dem Berge Thabor / Mat-  
thai 17. der sagt itzt / er sey nicht  
dabey gewesen. Der Herr wol-  
le vns regieren / durch den heili-  
gen Geist / vnd fur des bösen  
Geistes anfechtung behüten /  
Amen.

Zum dritten / den armen  
Sündern zu trost. Denn ob wol  
Petrus

Petrus schwerlich vnd gewlich  
gesündiget / so verzweifelt er  
doch nicht an der gnade Got-  
tes / wie Judas / sondern beweiz-  
net die sünde / lesset im dieselbige  
aus grund seines hertzen leid  
sein / vnd helt sich an die wort  
des **WERRN** Ihesu / da er saget /  
Ich habe fur dich gebeten / das  
dein Glaube nicht auffhöre.  
Vnd wird also widerumb auff-  
genommen zu gnaden. Darumb  
wenn wir gesündiget / sollen wir  
vns zum **WERRN** bekeren /  
Busse thun / vnd vergebung der  
sünden durch Christum glen-  
ben / so wird vns gnade wider-  
faren / vnd die sünde wie Petro  
vergeben.

Von dem erbermlichen ab-  
schied des verrheteris  
Jude.

In Juda lernet man / was  
C iij der

der sünde art ist / als die da pfle-  
get heimlich ein zuschleichen /  
aber darnach dem Menschen /  
wie ein tödliche Biff nach Leib  
vnd Seel zu stechen / wie man  
an Juda erfahren / vnd an de-  
nen / welche mutwillens sündi-  
gen / achten weder warnung  
oder straffe / glauben nicht / das  
der Teuffel so schwartz sey / als  
man in malet / noch das die  
Delle so heis sey / wie man sagt /  
bis sies zu letzt mit ewigem ver-  
derben / an Leib vnd Seel erfa-  
ren müssen. Darumb hüte man  
sich für sünden / denn wenn sie  
anfahen dem Gewissen zu pre-  
digen / das ist / auff zu wachen /  
vnd sich zu regen / da kompt  
denn der Teuffel so bald / vnd  
spricht den Segen drüber / das  
ist / er bleset zu / macht die sünde  
jmer grösser / bildet dem Men-  
schen ein das schreckliche vrteil  
Gottes / bis er den Menschē zur  
verzweuelung treibet. **Bar**

Barabas der Mörder wird  
los gegeben / aber Christus  
der unschuldige / wird verur-  
theilet zum tode des Creu-  
tzes.

O quanta infortunium Iudæo-  
rum iniquitas, prætulerunt seditio-  
sum & homicidam autori uitæ /  
spricht Theodulus.

## Von der Krönung.

Der Herr Ihesus sitzet vn-  
ter den Dornen / bedeutende /  
das die Gottfürchtigen vnd  
Glaubigen / vnter dem Creutz /  
trübsal vnd verfolgungen / wel-  
che das fleisch stechen / vnd im  
weh thun / sitzen werden / Acto.  
14. Aber wie Christus bald her-  
nach erhöhet ist worden / vber  
alles so in Himel vnd auff Er-  
den

C iij

den



den ist / Philip. am 2. Also sol-  
len auch alle Gleubigen bekenn-  
nen nach diesen zeitlichen trüb-  
saln / zu ewiger freude vnd herr-  
ligkeit erhaben werden / Joh. 16.  
Rom. 8. Darumb sagt S. Die-  
ronymus also: Lubens tormenta  
patior, ut mihi futura struetur glo-  
ria,

Don

# Von Pilati Hende waschen.



Manus quidem lauit Pilatus,  
sed non diluit facta, Iudex enim non  
debit inuidiæ cedere alienæ nec timori,  
ut sanguinem innocentis ad-  
diceret morti, spricht der heilige  
Ambrosius.

C v

Von

Von Simon Cyres  
neo/der dem HErrn sein  
Creutz nach trug.



Dieser Simon / qui fuit gens  
tilis & peregrinus / ist ein figur  
vnd bedeutung gewesen / das  
auch die Heiden zur gnade des  
Euangelij komen sollen. Denn  
Simon

Simon heisset so viel als obedi-  
ens, Cyrenæus, das ist / hæres per  
quem designantur Christiani ex gen-  
tibus conuersi, qui peregrini erant  
testamentorum Dei, sed credendo  
& obediendo diuinis mandatis, facti  
sunt ciues sanctorum & domestici  
atq; hæredes Dei, sagt Jordanus/  
Vnd ist solches angangen / als  
Paulus vnd Barnabas zu An-  
tiochia den Jüden sagten / Euch  
musste zuuor das wort Gottes  
gesagt werden / Nu jr es aber  
von euch stoffet / vnd achtet euch  
selbs nicht würdig des ewigen  
Lebens / sihe / so wenden wir  
vns zu den Heiden / Acto. 13.

Weinet nicht ober mich/  
sondern ober euch vnd  
ober ewre Kinder.

Als wolt er dis sagen. quia  
est ordinatio Dei, mea uoluntas &  
uulsa

utilitas uestra : non prohibeo com-  
passionem, sed aliam fletus causam  
ostendo. Thut man solches am  
grünen Holtz / was wil am dür-  
ren werden: Das ist / lesset Gott  
einen solchen ernstern zorn vber  
mich / seinen lieben Son gehen /  
dieweil ich frembde sünde auff  
mich genomen habe / dafür zu  
bezalen. Was wil aber denen  
widerfaren / die sich mit eigenen  
sünden beladen / vnd wollen da-  
von nicht abstehen. Auch betref-  
fen diese wort den erbermlichen  
vntergang vnd verwüstung der  
Stad Hierusalem vnd des gan-  
tzen Jüdischen Landes / gesche-  
hen durch die Römer.

Von Pilati vberschrift /  
dem Herrn Ihesu zu seinem  
Haupt ans Creutz ge-  
hefft.

Hie



Die sihet man ein Wunder  
werck Gottes / Christus ist an-  
genagelt mit den Henden am  
Creutz / noch füret er Pilato die  
Feder / das er nicht schreiben  
mus was im gefellig / sondern  
wie es Gott gefelt. Auch sehen  
wir allhie / das des Königes  
hertz ist in der Hand des D<sup>r</sup>er  
fett:


ren. Denn es mus Pilatus sein  
schreiben / auff der Hohenprie-  
ster erforderung / nicht endern /  
sondern es stehen lassen / den  
Jüden zu ewiger schmach vnd  
schande / als welche iren König  
vnd Messiam / der doch vnschul-  
dig war / jemerlich haben er-  
mordet / Darumb lauts gleich  
also IHESVS NAZARENVS REX  
IVDEORVM, id est, ideo crucifixus  
est, quia erat Rex Iudæorum.

Es ist alles vollbracht.

Das ist / Ich habe das jeni-  
ge / so mir mein Vater von  
wegen des Menschen / densel-  
ben zu erlösen auferlegt / hinü-  
ber / vnd mein leiden ausgestan-  
den / wie solches die Propheten  
lange zuuor von mir geweiss-  
aget haben / vnd ist hinfort nichts  
mehr vbrig / denn das ich dis  
mein



mein zeitlich leben ende. Vnd  
wir sollen vnd können dieses  
worts Consumatum est, brauchen  
wider die Sünde / wider den  
Tod / wider die Helle / wider  
den Teuffel vnd die Welt / wenn  
wir von der ein werden anges  
fochten. Es ist volbracht / id est,  
Christus hat die sünde ausge  
tilget / den Tod verschlungen /  
die Helle zerstöret / den Teuffel  
gefangen / vnd die Welt vber  
wunden.



Vom Wasser vnd Blut / so aus  
des Herrn Christi seite geflossen.



Sagt S. Augustinus also:  
Vulnus lateris Christi fuit ostium Sacra-  
mentorum.

D

LII



## Nidergefahren zur Hel- len.

Das er sie zurriffe vnd zur-  
störte / vnd dem Teuffel seine  
macht neme / sonst hetten wir  
müssen hinein faren / vnd darin  
ewig bleiben / Wie solchs der  
Herr zuvor gedrawet / durch  
den Propheten vnd gesagt / Wel-  
le ich wil dir ein Pestilentz sein.  
Denn er hat durch sein niderstei-  
gen zur Hellen / eine rechte Pe-  
stilentz hin ein gesand / das es  
darin ist gar ausgestorben / al-  
so / das die Helle nimermehr ei-  
nen glaubigen Menschen sol be-  
halten können.

Er ist hinunter gefaren / ni-  
cht der meinung / das er darin  
nen etwas solte oder müste lei-  
den / sondern es ist damit zu gan-  
gen / gleich als wenn erwa ein  
Hauptman oder ein Richter ins  
Gefengnis gehet / nicht darumb

D ij      das

Das er in demselbigen gedencke  
zubleiben / oder sich martern zu  
lassen / sondern den armen ge-  
fangenen Menschen entweder  
zu trösten / oder in gar los zu ge-  
ben.

Am dritten tage wider auff-  
erstanden vnd den  
Toten.

Die aufferstehung vnser  
lieben Herrn Ihesu Christi /  
ist ein gewis zeichen gewesen /  
das das Gesetz erfüllet / die sün-  
de weggenommen / der Tod ver-  
schlungen / die Welle gestürmet /  
den Teuffel gebunden vnd ge-  
fangen / die Welt vberwunden  
sey / wie er bekennet vnd saget /  
Im sey gegeben gewalt im Him-  
mel vnd auff Erden.

Chri



Christus sprach zu Ma-  
ria Magdalena / Küre mich  
nicht an/denn ich bin noch ni-  
cht auffgefahren zu meinem  
Vater.



Ich weis wol/das viel die-  
sen Spruch deuten / das der  
Herr

**H**err Christus nicht rede von  
der leiblichen / sondern Geistli-  
chen anrührung / nemlich / das  
in Maria nicht recht ehrete mit  
der eusserlichen vmbfahung /  
darumb das sie noch nicht mit  
dem rechten Glauben in vmb-  
fienge / vnd das er saget / Ich  
bin noch nicht auffgefahren zu  
meinem Vater / sol man nicht  
auff Christum / sondern auff  
Magdalenam sehē welche noch  
nicht glaubte / das Christus in  
seines Himlischen Vaters  
Reich eingangen sey / vnd sitze  
zur rechten Gottes / Sol aber  
dieser Spruch nicht also von  
vns veracht werden / sondern  
wir sollen in einfeltiger weis ver-  
stehen.

**W**ie nu Magdalena dem  
Herrn Christum erkent / das  
ers sey / vnd warhafftig auffer-  
standen sey / lenet sie sich an in /

**D** iij

vnd

vnd ergreiffet in also / das sie jr in  
irem sinn furnam / sie würde in  
nicht mehr verlieren / bis das sie  
in den Jüngern hette widerumb  
lebendig geweiset vnd gezeiget.  
Antwort j der Herr Christus /  
Rüre mich nicht an / das ist / du  
darffest mich nicht so hart an-  
greiffen vnd halten / das du  
mich als einen Gefangenen zu  
meinen Jüngern fürest / denn  
ich bin noch nicht auffgefaren  
zu meinem himlischen Vater /  
ich habe oder wil mich noch ni-  
cht fur eweren angesicht ver-  
bergen / ich bin noch nicht zu  
meiner herrligkeit eingangen /  
also das jr mich mit eweren au-  
gen nicht mehr sehen möchtet /  
sondern wil gegenwertig noch  
bey euch sein viel tage / vnd wil  
mich euch noch vielmals zusehē  
geben / ehe ich meine sichtbar-  
liche gestalt vnd beywohnung  
bey euch hinlege. Derhalben las  
mich

mich itzunder von dir gehen/  
vnd gehe hin zu meinen Brü-  
dern / jnen zuverkündigen / das  
ich nicht wil von jren augen gen  
Himmel faren / ich habe denn zu-  
vor offtmals mich von jnen se-  
hen lassen / vnd geoffenbaret /  
das ich warhafftig von den tod-  
ten sey auffgestanden.

### Auffgefaren gen Hi- mel.

Der Euangelist S. Lucas  
schreibet / das der Herr Chri-  
stus am Olberg / in gegenwart  
seiner Jünger sey auffgefaren /  
vnd lauten die wort also: Vnd  
da er solches saget (nemlich von  
der sendung des H. Geistes)  
ward er auffgehoben zusehens /  
vnd eine Wolcke nam in auff  
von jren augen / vnd als sie im  
nachsehen in den Himmel faren /  
sibe / da tratten neben sie zween  
D v Men



Menner in weissen Kleidern  
(welche Engel gewesen sein)  
vnd sagten / Ir Menner von  
Galilea / was stehet jr vnd sehet  
in den Himel? Dieser Ihesus  
welcher von euch ist auffgeno-  
men gen Himel / der wird ko-  
men wie jr in gesehen habt gen  
Himel faren. Von solchem Ar-  
tikel vnserz Glaubens schreibet  
er

er weiter im 24. Cap. da er kurtz=  
lich saget / Er füret sie aber hin=  
aus bis gen Bethanien / vnd  
hub die Kende auff / vnd segnet  
sie / vnd geschach / da er sie seg=  
net / trat er von in / vnd fur auff  
gen Himel. Desgleichen S.  
Marcus im 19. Capitel / Vnd  
der Herr / nach dem er mit in  
geredt hatte / ward er auffgeha=  
ben gen Himel / vnd hat sich  
zur rechten Hand Gottes ge=  
setzt. Auff diese weise spricht der  
Herr Christus selbs zu Maria  
Magdalena / Johannis am 10.  
Capitel / Gehe hin zu meinen  
Brüdern vnd sage in / Ich fare  
auff zu meinem Vater / vnd zu  
ewrem Vater / zu meinem Gott  
vnd zu ewrem Gott / Also auch  
Petrus in seiner ersten Predigt  
bezeuget / wie in der Apostel Ge=  
schieht am andern Capitel ste=  
het / Nu er durch die rechten  
Gottes erhöhet ist / vnd empfan  
gen

gen die verheißung des heiligen  
Geistes vom Vater / hat er aus-  
gossen dieses das jr sehet vnd  
höret.

So schreibet auch S. Paulus  
zum Ephesern am 4. Capitel /  
Er ist auffgefahren vber alle  
Himmel / auff das er alles erfül-  
let. So haben auch zuuor die  
Propheeten / von der Himmelfart  
Christi geweissaget / Wie Da-  
uid im 28. Psalm saget / Der  
Wagen Gottes ist viel tausent  
mal tausent. Der **HEH** ist vn-  
ter in im heiligen Sinai. Du bist  
in die höhe gefaren / vnd hast  
das Gefengnis gefangen / du  
hast Gaben empfangen für die  
Menschen / Vnd wie S. Paulus  
meldet / Gott hat den Men-  
schen Gaben geben. Item im 110.  
psalm / Der **HEH** sprach zu  
meinem Herren / Setze dich zu  
meiner Rechten / Bis das ich  
deine Feinde dir zum schemel  
deiner

deiner Füße lege. Aus welchem  
Spruch der Apostel Petrus die  
Himelfart Christi probiren  
wil/welche Sprüche vns dazu  
nütze sein / das wir nicht sollen  
zweueln/an diesem Artikel vn-  
seres Glaubens / Auffgefare-  
gen Himel.

So heist nu Christus auff-  
gefare gen Himel/ nicht das  
er einen besondern ort / in dem  
sichtbarlichen Himel / mit sei-  
nem Leibe einneme / vnd allein  
nur an demselbigen ort muste ge-  
funden werden oder bleiben/  
Sondern wie zun Hebreern ge-  
schrieben stehet / ist er in den Hi-  
mel gestiegen / vnd gefaren vber  
alles / was im Himel vnd auff  
Erden ist. Das er aber auffgefa-  
ren ist / spricht S. Paulus /  
Was istis? denn das er zu erst ist  
hinunter gefaren / in die vnter-  
sten ort der Erden / Der hinun-  
ter gefaren ist / das ist derselbe /  
der


der auffgefahren ist vber alle Himel / auff das er alles erfüllet. Vber alle Himel spricht er / ist er auffgefahren / auff das er alles erfüllet / Ja das er nicht allein die gantze Schrift erfüllet / wie denn etliche dieses aus iren trewen men deuten wollen / sondern das er erfüllete irrdische vnd Himelische / Himel vnd Erden / vnd alles was da ist.


Darnach heist Christus auffgefahren gen Himel / vnd in seines Himelischen Vaters Reich eingangen / nicht als wer er vor nicht im Himel gewesen / oder zugleich mit Gott dem Vater regirt hette / Denn nach betrachtung Göttlicher natur in Christo / ist er warlich zuvor im Himel vnd in seines Vaters Reich gewesen / Darnach ist er auch von anfang seiner Menschwerdung / im Himel gewesen / wie solchs der Herr Christus selbs

selbs bezeuget / Johannis am  
dritten Capitel / Niemand feret  
gen Himel / denn der vom Himel  
ernider Kommen ist / nemlich /  
des Menschen Son / der im Himel  
ist / So haben wir auch  
solchs ein fein öffentlich Exem-  
pel in der verklerung vnser  
W<sup>er</sup>rn Christi / auff dem Ber-  
ge Thabor / von den dreien Jün-  
gern / wie Marcus vnd Lucas  
am 9. Capitel bezeugen / Vnd  
kürtzlich ist die Himelfart vn-  
ser lieben W<sup>er</sup>rn Ihesu Chri-  
sti / nichts anders / als ein able-  
gung des sichtbarlichen wan-  
dels auff Erden / das er also ni-  
cht sichtbarlich von den Men-  
schen auff Erden gesehen wer-  
de / vnd mit inen gemeinschafft  
habe / wie er zuvor vor seinem  
leiden / vnd sterben / vnd nach  
seiner frölichen Auferstehung  
gethan hat. Welchem sey  
lob / ehr vnd preis /  
Amen.

Faint, illegible text, likely bleed-through from the reverse side of the page. The text is arranged in approximately 20 horizontal lines across the page.








67  $\frac{10}{97}$




AB 67  $\frac{10}{c, 7}$

(x1992129)







# Eine Kurtze Erklärung etlicher Ge-

heimnis aus der Histori vom  
leiden/sterben/fröliche Aufer-  
stehung vnd Himmelfart / vnseris HERN  
IHESV CHRISTI, ganz nütze-  
lich zu lesen/vnd in Druck  
verfasset.

Durch  
M. Johan. Kanftium/  
Northusianum.



Wittenberg.

1567.